

浙江文叢

輿地紀勝

〔第七冊〕

浙江出版聯合集團
浙江古籍出版社

浙江文叢

浙江出版聯合集團
浙江古籍出版社

輿地紀勝

〔第七冊〕

卷第八十九至一百六

〔宋〕王象之 編著 趙一生 點校

輿地紀勝卷第八十九

廣南東路

秦平百越，置南海、桂林等郡。漢屬交州部。吳分交州置廣州。唐分嶺南、安南、桂管、邕管、容管爲五府，各置經略使，而嶺南節度使治廣州，是合廣南東、西二路之地，並隸于廣州。皇朝至道以後，分廣南爲東西路，東路兵馬鈐轄廣州領之，西路兵馬鈐轄桂州領之。皇祐四年，並兼本路經略安撫使，定分爲廣南東西兩路矣。以今日地理論之，廣（南）「東」〔一〕即秦南海地也，廣西即秦之桂林地也。

廣州

清海

番禺

南海

番州

東筦

經略軍

州沿革

廣州，中。都督府，南海郡，清海軍節度。《九域志》。廣南東路經略安撫使，廣東十四郡皆屬焉。今制《九域志》以爲領州十五。賀州已隸廣西，今督府所領者凡十四郡。《禹貢》：揚州之域。《晉書》〔二〕、《隋書》並謂交、廣之地，爲《禹貢》揚州之域。而《唐志》云：『嶺南道，蓋古揚州之南境。』《元和郡縣

志》亦云：『爲《禹貢》揚州之域。』《史記》謂揚越。《漢書》注云：『本揚州之分，故云揚越。』而《通典》則以爲非《禹貢》九州之域，又非《周禮·職方》之限。稽其封略，考其鎮數，而《禹貢》《職方》皆不及此，故列於九州之外。《皇朝郡縣志》云：『以今日之地里考之，潮州舊隸揚州，連州舊隸荊州，未可盡以爲九州之外也，合行修正。』

象之謂：晉、隋、唐之《志》，既作於《通典》之前，亦必有所據，未容盡廢也，姑兩存之。在天文，牽牛、婺女，則越之分野。《通典》云：『得漢之蒼梧、鬱林、合浦、交趾、九真、南海、日南，皆其分野。』《唐志》亦云：『嶺南道，蓋古揚州之南境。漢南海、鬱林、蒼梧、珠崖、儋耳、交趾、合浦、九真、日南等郡，韶、廣、康、端、封、梧、藤、羅、雷、崖以東爲星紀分，桂、柳、鬱林、富、昭、蒙、龔、繡、容、白、羅而西及安南爲鶡尾分。』韓文云：『踰甌嶺而南，皆古越之地。』於天文其次星紀，其星牽牛。兼得楚之交，《通典》云：『漢零陵、桂陽，今始安之北境及始興，宜皆屬楚。』春秋時百越之地，秦置南海郡，《元和郡縣志》。置南海尉，以任囂典之。《通典》。囂且死，召龍川令趙佗行南海尉事，《漢書·南越王趙佗傳》。佗自立爲南粵王。《佗傳》。漢因封之，《通典》。使和輯百粵，無爲南邊害，《佗傳》。凡王五世九十二年而亡。《寰宇記》。武帝既定越地，以爲南海、蒼梧、鬱林、交趾、九真、日南、珠崖、儋耳郡。《元和郡縣志》。按南海郡即秦南海故郡也，屬交趾刺史，沈約《宋志》云：『南海太守本秦立，尉佗王此。漢武帝元鼎六年，屬交州。』獻帝陞爲交州牧。《南海志》在建安八年。獻帝（永）「末」⁽¹⁾，孫權以步騭爲交州刺史，遷州於番禺，即今之州理也。此據《元和郡縣志》。又《通鑑·建安十五年》：『孫權以步騭爲交州刺史，而交趾太守士燮率兄弟奉承節度。』則交州刺史時已治交趾矣。自步騭爲刺史之後，始理番禺，後又以番禺爲廣州，而交州復治交趾。孫休以交州土壤太遠，乃徙交州理龍編。《元和郡縣志》。分交州置廣州，領郡十，理

番禺。《晉志》廣州下注云：「吳黃武五年，分交州之南海、蒼梧、鬱林、高（涼）〔四〕四郡立爲廣州，俄復舊。永安六年，復分交州置廣州，分合浦立合浦北部，以都尉領之。孫皓分鬱林立桂林郡。及太康中，吳平，遂以荊州始安、始興、臨賀三郡來屬。合統郡十。」又《通鑑·魏元帝咸熙元年》：「七月，吳分交州置廣州。」是時吳景帝孫休尚無恙也。是月吳景帝孫休卒，孫皓始立，而《元和志》乃以爲孫皓分交州置廣州，二者不同。象之謹按：孫休之卒，孫皓之立，同是永安六年七月，而所書建置有孫休、孫皓之異，似若難辨。然考之沈約《宋志》云：「廣州刺史，吳孫休永安六年分交州置。」則置於孫休也明矣，當從《宋志》。晉〔氏〕〔代〕〔五〕因而不改。《元和郡縣志》。安帝時，盧循陷番禺，執廣州刺史吳隱之。隱之拒守百餘日，城陷。循自稱平南將軍，攝廣州事。《通鑑》在晉安帝元興三年。循用徐道覆計，舉兵向建康。《通鑑》：晉安帝義熙六年，劉裕伐南燕，徐道覆勸循乘虛襲建康。會劉裕破南燕，引兵還，循兵至蔡洲，爲裕所敗，遂還尋陽。劉裕敗之於蔡洲，裕又治水軍，遣孫處、沈田子自海道襲番禺，傾其巢穴。《通鑑》在義熙六年八月。孫處乘海奄至番禺，攻拔其城。《通鑑》在義熙六年十一月。盧循既敗，收兵至番禺，圍之二十餘日，不能拔，乃走交州，至龍編敗死。《通鑑》在義熙七年。宋明帝分交、廣二州地，置越州，治臨漳。《通鑑》在宋明帝泰始七年。《宋志》云：「越州刺史，宋明帝泰始七年立，領百梁等九郡。」而《南齊志》云：「越州鎮臨漳，領臨漳等十七郡。」宋廣州領郡十七，齊廣州領郡二十三，皆理番禺。《寰宇記》。梁、陳並置都督府。隋平陳，置總管府。《隋志》。改廣州爲番州，煬帝改番州爲南海郡。《隋志》云：「仁壽元年，置〔番〕〔六〕州。而《通典》及《元和志》皆以爲置番州。往往以番禺以命州，當從《通典》曰番州。然諸書皆以爲改廣州爲番州在仁壽元年。象之謹按：《通鑑》：開皇二十年十一月立晉王廣爲太子，次年即便

改元仁壽，則仁壽元年改廣州爲番州，避太子廣之諱也。而改州爲郡，《通鑑》在大業中。唐平蕭銑，置廣州總管府。《寰宇記》在武德四年。《通鑑》：武德五年，廣州賊帥鄧文進降。是在隋末，已復名廣州，而所謂番州者，特避煬帝之諱耳。爲大都督府，《寰宇記》在武德七年。改中都督府，《寰宇記》在貞觀中。而《唐志》謂之中都督府。後以廣、桂、容、邕、安南五府皆隸廣州，以廣州爲嶺南五府節度、五管經略使。《南海志》云：在永徽以後。理所曰經略軍，南海郡，係本州城內有經略軍，額管鎮兵五千四百人。曰清海軍，恩平郡，管兵一千人。恩平今恩州。曰桂管經略使，始〔容〕〔安〕^{〔七〕}郡，管兵千人。曰容管經略使，普寧郡，管兵一千人。曰鎮南經略使，安南都護府，管兵四千二百人。曰邕管經略使，朗寧郡，管兵千七百人。名嶺南五管。已上並《元和郡縣志》。而《寰宇記》及《南海志》並以爲在永徽中。而《通鑑》：天寶元年《載》：『嶺南五府經略使，統經略、清海二軍，桂、容、邕、交四管治廣州，兵萬五千四百人。』《寰宇記》云：其衣糧皆本道自給。陞五府經略使，爲嶺南節度，《通鑑》在肅宗至德元年。改爲南海郡，《通鑑》：『天寶元年，改州爲郡，刺史爲太守。』復爲廣州。《通鑑》：至德二年十二月，改郡名、官名，一依故事。而諸書皆以爲在乾元元年，蓋至德二年十二月，詔改郡爲州，則遠方諸郡當至次年始改，故在乾元元年。五府不屬，自杜佑始。《新圖經》云：『自杜佑爲嶺南節度，當兼五府經略。適執政者遺脫，佑獨不兼，故五府不屬自杜佑始。』唐末，分嶺南節度爲東西道，改嶺南節度使爲東道節度。《唐方鎮表》在懿宗咸通三年。又《通鑑·咸通三年》：『蔡京制置嶺南，奏請分嶺南爲兩道，以廣〔川〕〔州〕^{〔八〕}爲東道，邕州爲西道。』黃巢攻破廣州，《五代史·劉隱傳》在乾符五年。而《通鑑》在乾符六年。不同。

象之謹按：《唐書·黃巢傳》：巢以

六年三月圍福州，後陷桂、管，寇廣州。其陷廣州在陷福州之後，不應六年陷福之後，五年却陷廣，當在六年。巢以士卒疾疫，不能守廣州，乃去掠湖、湘。《通鑑》在乾符六年。賜嶺南東道爲清海軍節度。《唐方鎮表》在乾寧二年。而《通鑑》不書賜嶺南東道爲清海軍節度一節，第云以薛王知柔爲清海軍節度，既同是乾寧二年，恐因除薛王知柔爲節度，故賜清海之名以寵之耳。昭宗時劉隱爲清海軍留後，天復元年。後以隱爲清海軍節度。《通鑑》在昭宗天祐元年。《五代史·劉隱傳》在開平二年。不同。象之謹按：《通鑑》

劉隱以天復元年爲清海軍留後。至天祐二年，節度徐彥若卒，遺表薦之。隱以重賂結朱全忠，乃奏以隱爲清海節度，年月可考。而《通鑑》於朱梁開平二年，亦無命清海軍之文，今不取。子孫竊據其地，至皇朝平嶺南地，歸版圖，《五代史·劉隱傳》云：『自唐天祐（三）（二）^九年，隱爲廣州節度使。』至皇朝開寶四年，平嶺南後，凡六十七年。仍舊爲清海軍節度。《國朝會要》在開寶四年。領廣南東路，兵馬鈐轄。《圖經》云：在景德二年。帶本路經略安撫使，《通略》在皇祐四年。陞爲帥府。《國朝會要》在大觀元年。今領縣八，治南海、番禺二縣。

縣沿革

南海縣，望。

倚郭。本秦番禺縣地，屬南海郡。《元和郡縣志》云：『隋開皇十年，分置南海縣，屬廣州。』《隋志》南海縣

下注云：『分置番禺縣，尋廢，大業初置郡於此。仁壽元年，隸番州。大業初，隸南海郡。』唐隸廣州。僞漢置咸寧、常康二縣。《國朝會要》云：『開寶五年，詔廢僞漢，廣州常康、咸寧二縣依舊爲南海（鎮）〔縣〕^{〔10〕}。』《寰宇記》云：『（仍）併番禺縣入焉。』

番禺縣，上。

倚郭。《元和郡縣志》云：本〔秦〕^{〔11〕}（番禺）舊縣，故城在今縣西南二里。縣有番、禺二山，因以爲名。『屬南海郡，漢以來因之。』《宋志》云：漢立番禺縣。故兩《漢志》及晉、宋、齊《志》南海郡下，並有番禺縣。開皇十年，改置南海縣，即今縣是也。長安三年，於江南洲上別置番禺縣，取舊名也。其洲周回約八十里。《國朝會要》云：『開寶五年，併番禺入南海。皇祐五年，復置。』《輿地廣記》：與南海分治郭下。

清遠縣，〔中〕^{〔112〕}。

在州北二百四十里。《元和郡縣志》云：『本漢中宿縣地，隸南海郡。』吳、晉並隸始興郡。故《晉志》始興郡下有中宿縣。《元和志》又云：『梁於此置清遠郡，中宿縣屬之。開皇十年，郡廢，置清遠縣，屬廣州。』《隋志》云：『舊置清遠郡，又分置威正、廉平、恩治、浮護等四縣。平陳，並廢，以置清遠縣。』《唐志》云：『武德六年，省（正）〔政〕^{〔113〕}，實縣入焉。』

懷集縣，中。

在州北一百八十里。《寰宇記》云：『本漢四會縣地，屬南海郡。』《宋志》於綏建郡懷集縣下云：『本四會縣之銀屯鄉。元嘉十三年，分爲懷集縣。』《元和郡縣志》云：開皇十年，改屬涇州，即今廣州浚縣理是也。『二十年，廢涇州，改屬廣州。』《唐志》云：『武德五年，置威州，併析置興平、霍清、威武三縣。貞觀（三）〔元〕〔四〕年，州廢，省興平、霍清、威武三縣入懷集，來屬廣州。開元二年，省永固縣入焉。』《國朝會要》：開寶五年，併浚水縣入焉。

東筦縣，中下。

在州東南三百里。《寰宇記》按《南越志》云：『水〔東〕流入海，帆道三〔一五〕日至東筦。』漢順帝時，屬南海縣地。《元和郡縣志》云：『晉成帝咸和六年置寶安縣，屬東筦郡。』《宋志》：『東官太守治寶安縣。』而《南齊（至）〔志〕〔一六〕》東官郡有寶安，而治懷安。《元和志》又云：『開皇十年，廢郡，以縣屬廣州。』故《隋志》廣州南海郡下有寶安縣。《寰宇記》云：『隋立寶安縣。』然宋、齊《志》東官郡下已有寶安縣，則寶安縣非置於隋也。《唐志》云：『本寶安，至德二年，更名東筦。』《國朝會要》云：『開寶五年廢，隸增城縣，六年復置。』

增城縣，中。

在州東一百二十里。《元和郡縣志》云：『本〔漢〕〔一七〕番禺縣地，後漢置增城縣。』故《後漢志》南海郡下有

增城縣。又云：『按崑崙山有閩風、增城，取美名也，屬南海郡。』晉、宋、齊因之，故三《志》並有增城縣。《隋志》增城縣下注云：『舊置東筦郡，平陳，廢。』《寰宇記》云：『吳黃武中，於此置東郡，而立增城縣。』不同。象之謹按：增城已見《東漢志》，非立於吳也。又漢、晉、宋、齊《志》曰：增城縣並隸南海郡，又非隸於東官郡也。《隋志》第二云：舊置東筦郡，不明言置於何時。然《宋志》雖則有東筦郡，云咸和六年分南海縣立，乃治寶安縣，非治增城縣。二者俱不同，當考。《國朝會要》云：『開寶五年，廢增城縣，六年復置。』

新會縣，下。

在州西南三百三十里。本漢南海郡地。《晉志》云：『恭帝分南海立新會郡。』《宋志》云：『晉恭帝元熙二年，分南海立。』宋、齊《志》並有新會郡，而無新會縣。《元和志》云：『隋開皇十年，置新會縣，屬岡州。』象之意：其郡雖置於晉，而縣則置於隋耳。《隋志》云：『舊置新會郡，平陳，郡廢，又併（孟台）〔盆允〕^{〔一八〕}、永昌、新建、熙潭、化召、懷集六縣入爲封州。十一年，改爲允州，後改爲岡州。大業〔初〕^{〔一九〕}州廢，併廢封樂縣入焉。』《唐志》：『武德四年，以義寧、新會二縣置岡州新會郡。貞觀十三年，州廢，以新會、義寧屬廣州。是年，復以二縣置岡州。開元二十三年，州廢，以新會、義寧屬廣州。』

香山縣，下。

在州東南四百里。本東筦縣香山鎮。元豐五年，運判徐九思請建爲縣。《國朝會要》云：『紹興二十二年，又陞爲縣。』不同。恐建請於元豐，而創置於紹興耳。不然，則元豐創縣，中間復廢，至紹興而復置。二者不同。

《新圖經》云：『元豐徐九思請建爲縣，止置寨官一員。紹興二十二年，東筦縣姚孝資請州聞于朝，創立縣也。』

監司沿革

廣南東路轉運司

臺治在城中。《通略》云：『太祖開寶四年二月，克廣州。夏四月，以王明爲廣西轉運「副」使。』《長編》云：『開寶五年，命同知廣州潘美、尹崇珂並兼嶺南轉運使，王明爲副使，許九言爲判官，轉運判官自九言始也。』《通略》云：『開寶四年，置市舶司於廣州，知州爲使，與運使同掌之。』則是運使與知州同置司於廣州，自此常置司廣州。

提舉常平茶鹽司

臺治在城中。《南海志》云：『廣南茶鹽提舉置司，實始於宣和二年。』按《職源》云：『熙寧中，遣使提舉常平，此提舉常平之始也。宣和中，推行鈔法，添置提舉，此提舉茶鹽之始也。其後廢置不常。至紹興五年，詔諸路提舉茶鹽官併入茶鹽司。至十五年，詔諸提舉茶鹽官改充提舉常平茶鹽公事，至今職任如故。』

提舉市舶司

臺治在城中。按《通鑑》：唐代宗廣德元年，有市舶使呂太一。《太祖實錄》開寶四年下，廣南以同知廣州

潘美、尹崇珂並兼市舶使，通判謝處訔兼市舶判官。陳了齋父偁傳云：『熙寧中，詔泉人賈海外者，往復必使（東）詣廣〔東〕^{〔三〕}，否則沒其貨。元豐三年，詔書言廣州市舶條已修定，乞專委官推行。廣東安撫更不帶市舶使，後專置提舉，而轉運亦不復預矣。』《中興小曆》云：『建炎詔兩浙、福建市舶歸轉運司，而廣南如故。』《中興會要》載：高宗問張闡：『舶司歲入幾何？』闡對云：『以歲計之，約二百萬緡。』如此則三路所入，已不爲少。

風俗形勝

番禺負山阻險，南北數千里。《西漢·南粵傳》。和輯百粵。《西漢·南粵傳》。集楊越以保南藩。《史記·南粵敘傳》。地總百越，山連五嶺。《史通》。連山隔其陰，鉅海敵其陽。韓文。人於南海，如東西州焉。韓文。盡取南海之民。同上。廣南越分，謂之嶺表。《類要》。嶺南五府，其四各置帥，獨節度爲大府。韓文《送鄭權序》。嶺南帥得人，則一邊盡治，選帥常重於他鎮。韓文《送鄭權序》。南海之墟，祝融之宅。韓文《南海廟碑》。州岳所產，豈直明珠、大貝而已。梁王僧孺《南海郡求士教》曰『風序泱泱，衣冠斯盛』云云。南方事無不統。《南海廟碑》『刺史常節度五嶺諸軍，仍觀察其郡邑』云云。帝命南伯。《南海廟碑》。地大且遠，常選用重人，以殿南服。《南海·廟碑》。外國之貨日至，珠香、犀、象、玳瑁奇物溢於中國。韓《送鄭權序》。南海之間，有衣冠之氣。郭璞。濱際海隅，委輸交部。《南齊志》。捲握之資，富兼十世。尉佗餘基，亦有霸跡。《南齊志》。南海、交趾，各一都會，所處近海，多犀象、瑇瑁、珠璣，奇異珍瑋，故商賈至者，多取富焉。《隋志·揚州南海序》。其人性並輕悍，椎髻箕踞，乃其舊風。其俚人則質直尚信。同上。包山帶海，珍異

所出。《晉書·吳隱之傳》：廣州云云。嶺外最遠，可以避地。《五代史·劉隱傳》：『唐末天下已亂，中朝士人以云云，故多遊焉。』唐世名臣，子孫皆客嶺表。《五代史·劉隱傳》云：『唐世名臣謫死南方者，往往有子孫皆客嶺表。』自嶺以南二十餘郡，南海一都會也。《隋志》：越臺之境，胡賈雜居。余靖《知廣州表》：南海實筦樞之地，有金珠貝甲脩牙文犀之貨。唐劉蛻《獻南海崔尚書》：廣州負山，包帶南溟，陸寶可富，捲握致盈。《南海集》：環水而國以百數，則統于押蕃舶使焉。柳宗元：五嶺峙其北，大海環其東，衆水匯于前，群峰擁于後，氣象雄偉。蔣之奇《州學記》：吾州南肘大海，厥土廣濶，牢盆取贏，又百佗郡。洪邁《鹽倉記》：番禺大府，節制五嶺，秦漢已來，號爲都會，俗雜五方。余靖《羅漢院記》：番禺控引海外諸國，賈胡歲具大舶，齎奇貨，涉巨浸，以輸中國。許得已《南海廟達奚司空碑》：逖彼番禺，去都萬里，境接群蠻，地居海涘。許致撰《魏公遺愛碑》。

景物上

廣府

韓「愈」《潮州「刺史上謝」^[111]表》。又《唐大詔令》云：『減抵罪決杖詔，江淮人移隸廣府。』

番州

《隋志》。

番山

在南海。

禺山

《通典》云：『在番禺縣，即尉佗葬處。』又《番「禺」^[112]雜記》云：『番山在南，禺山在北。』

王山

《通典》云：在南海。

州城 《元和志》云：『步鷲所築也。鷲爲交州刺史，登臺遠望，乃曰：「（新城）〔斯誠〕」^{〔二四〕}海島膏腴之地，宜爲都邑。』遂遷州於番禺，建築城郭焉。』

東溪 在州東。即甘溪下流，夾流皆刺桐，（傍）〔旁〕^{〔二五〕}有坦途，郡人踏青之地。

東城 熙寧中，呂夷簡得郡治東古城遺址築之，袤四里。

西城 熙寧〔四年〕^{〔二六〕}，程師孟築，周十餘里。

南海 《元和志》云：『在南海縣南，水路百里。自州東八十里，村號曰「古斗」，自此出海，浩淼无

際。』韓文公《送竇從事序》亦有『南海』二字。

金山 在新會縣西百五十里。《唐·地理志》：山容焦赤下，有：『昔人所掘窟深窅如井，俗云：掘之

愈深，有金沙如糠粃狀。』

寶山 在東莞縣。舊以山有寶，置場烹銀，名石甕場。今山中銀滓猶存。

鼓門 廣州刺史周（敞）〔敞〕^{〔二七〕}採龍山木爲門鼓，一給桂林郡，一給交州，隔二州二鼓相應。

斗村 按《廣州記》云：『廣州東一百里有「古斗村」，自此出海，溟渺無際。』

日井 在州治野渡北。

月觀 在清海樓西。

月溪 在清遠縣。其源出牛嶺，合真江。

鳳水 在南海^{〔二八〕}東北八十里。從高流下巨石，激散如鳳舞之狀。

鰐湖 在東筦之東監。方圓數十丈，其深無底，舊有鰐魚，故名。

猊山 《元和志》云：『在增城縣東南二十三里。多婆娑羅竹，圍三四尺，至堅，里人以爲弓，弓形如弩。』

鼃泉 在增城縣西青山。有神鼃，帶銅環上此水，有穢此水，則便澍雨。

牛潭 事見金鎖潭下。

龍戶 見詩門。

龍窟 蒲母養龍人呼爲龍窟。

堯山 《寰宇記》云：『在南海縣^{〔二〕}。舊在洽^{〔沂〕}縣三十里^{〔三〕}。盛弘之《荊州記》云：『堯山赭

巖迭起，冠以青林。』《郡國志》云：『廣州堯山高四千丈，自番禺迄交趾見之。』

湯泉 在清遠縣東二百里。有石如鑊，泉流不竭，氣蒸如霧，可煮食物。

燠洲 在番禺縣南八十里海中。上有蒸燠之氣，因名。

五嶺 李善《文選》五嶺注曰：『秦北爲長城之役，南有五嶺之戍。』裴閔《廣州記》：『五嶺，大庾、始

安、臨賀、桂陽、揭陽也。』

五管 《事略》云：『初，朝廷禦邊，重西北而輕東南，知制誥王拱辰請倣唐制，益東路之潮，西路之邕、容，各總節制，與廣、桂爲五管。』

沓潮 《劉禹錫集》云：『元和十年，終風駕潮，南海羨溢，南人曰「沓潮」也，率三更歲一有之。余爲連州客，或爲子言其狀，因歌之。附于《南城志》。』

聖池 在新會縣北二里。有山號北山，山頂有塘，四時花果不種而生，及成實，有樵夫採摘者，輒有雷雨。古號爲聖池，今基尚存。

真水 在清遠縣東七十里。流經縣前過，至上梅村四會縣分界。《漢書》云：『樓船將軍楊僕出豫章，下真水。』是也。

廉水 在清遠縣西四十里高平鄉。源出重山趾，水側有人姓廉居此，因以爲名。

貪泉 在番禺縣西二十里石門口北岸。《郡國志》云：『呂嘉拒漢，積石江中爲門，水名貪泉。舊云登大庾嶠則清穢之氣分，飲石門泉則清白之質變，即吳隱之舉卮處。』《南越志》云：『昔漢將田千秋征南越，全軍覆沒之處。』

靈山 在增城縣北開元鄉。遇旱，祈雨輒應。

利山 《元和志》云：在新會縣。

越溪 在州東北三里。自景泰山流下而至超悟寺，曰越溪。又東與東溪會，俱入于海。

燕水 在清遠縣。源出番禺縣黃山，北流九十里，合真江。

秦水 在清遠縣。其源出本縣界秦山下，南流四十里，入官湖，合真江。

崑山 在新會縣。有道人卓庵於上，其巔有井，曰天井。

崙山 在新會縣西北六十里。上有白龍池。故老云：有龍飛騰于山巔。

峽山 在清遠縣東三十里。崇山峻峙，如壁太華。中通江流，廣慶寺居峽山之中，有殿甚古，梁武帝時物也。舊傳黃帝二庶子善音律，南採崑崙竹爲黃鍾之管，隱于此山。祠在東廡。

石門 在州西北二十里。兩山對峙，橫截巨浸，據南北往來之衝，屹若門闕。漢樓船將軍楊僕將精卒先陷尋陞，破石門，即其地。

藥洲 在西園之石洲。郭祥正《遊藥洲詩》云：「驅車欲何適，獨往觀藥洲。大亭插層城，玉虹跨深溝。常年一百五，載酒傾城遊。」

武山 在東筦縣海南柵之南。余靖嘗候潮於此。

圓沙 昔有賴布衣改遷邑基，留識云：『沙頭圓，出狀元。』

桂蠹 〔桂蠹〕傳曰：『尉佗獻桂蠹（一）〔一〕〔桂蠹〕器。』注云：『桂樹蠹虫者也。』

景物下

簡節堂 在州治。

整暇堂 在州治。

坐嘯堂 在州治。

清風堂 在東園。

廣平堂 在州治。以宋璟而得名也。

慶瑞堂 在州治。熙寧中，產雙蓮。經略曾布建。